


P.L. 17

ARCHIVES
Missionaries of Africa
ZAMBIA

UKWIBE CABU

IFYAKWA ROBIN HOOD

Mis. Afr
ZAMBIA
ARCHIVES



UKWIBE CABU

IFYAKWA ROBIN HOOD



LANGUAGE CENTRE
ILONDOLA
CHINSALI P. O.
ZAMBIA (AFRICA)

by
MAX KESTER

Illustrated by
JOHN KENNEY

Translated from English into Cibemba by
The Northern Rhodesia Publications Bureau Staff
1964

Publishers: Wills & Hepworth Ltd., Loughborough

©

Printed in England

UKWIBE CABU

Bushiku bumo kumibundo ulucelo, pefamu limo ifi ilyo basombwelemo ifilyo, ilyapalamine kumutengo wa Sherwood, kwali icongo icishaibipila. Icongo ici cali cikalamba nganshi, calengele na mukakateeba-wa-nkuni uwaleikala mukayanda kumpela yamutengo ukupoose ceswa alepyangilako abutukila kukulolesha kumwinshi. Ifyo amwene, fyalengele ukuti abwelele cimfutyanyuma bwangubwangu mukayanda, aisalako neciseko cinshinshicinshinshi. Abashikale babili, nefisote fyakamba ifyafiita kumitwe, e fyakubeshibilako ukuti bali pamilimo ya mfumu-sha-bene Ba Guy Mukulu aba ku Gisborne; baletantanya akamuntu bubibubi ukukacilinganye bala liine. Lelo cilya congo caleumfwika te kamuntu atemwa abashilika balecita iyoo; libumba lyamashipi ya akakene kashikulu baletintanya, e yalelila nokupamanya amapindo nokutintimune mikoshi nshila yonse umo balekulanya kashikulwibo, limbi kutala cimo cakoma nomulomo mumukonso wamushilika, lelo ena kucipantila fye icipaaka mumbali.



Kalya kamuntu baikete pafyepafye ishina lyakako ni ka Price; kasosa akati: "Napa-paata mwe shamfumu shabene, ngakanshi ine cinshi ncitile pakumfyatila umusango uno?"

Umushikale umo ati: "Uleipusha ifyo ucitile mwa? Tawishibe ukuti amashipi yobe yasala mwibala lyakwa shikulwifwe Ba Guy ba ku Gisborne?"

Umubiye nao ati: "Mwa, bushe tawishibe ukuti tulekutwala kwisano uko baleyakulopola ucenjele."

Price ati: "Ngakanshi mwe makombe ya mfumu, ine ico nabifya cinshi? Mwibala balikobolamo ifyakulya, inanu shonse bali-seepa! Amashipi yandi yasala ifikwi mwibala mulya pakuti yakanone ayakuipakisha pa Caka."

Umushikale umo ati: "Ha, efyo uleilya ati, ala tawakayamone nakabili! Ifyo ine nayatemwa!" Aimyangula na pakanwa.

Lilya balepita pakayanda kakwa kateebawa-nkuni, umukashi wakwe apepeke fye ukutwi, natesha fyonse ifyo balya bantu balelanda.



Cilya bapita bashingilila, aisalompoka na mukayanda afunga neciseko, canakashi wakantu afunshila nendeleshi mumulu, alanya umutengo ulubilo, ukulola kukayanda kakwa ulyawine bekeete. Kuti ngamulya, amona umwanakashi uwaina uwacikalamba, alecapa amalaya yakwe mukamulonga akapitile palubansa, nenkumba shimoshimo ishaondoloka shiletunka mwisamba lyafimuti ngafilya. Muka kateebawa-nkuni afika apo ali aiminina nokupe-mashika bulandabulanda.

Umwanakashi mukalamba nakaluseko pamilomo ati: “Yaba wemunandiwe kulici?”

Ukwabula nokupose nshita, cikashana atampako ati: “Mayo muka Price, ala abashilika, abakwakamfumu Guy baikata balo, bamusenda kukuumwa ifikooti—yangu mayo, nali nintsha noko bali baleti balebwela kukwisasenda namashipi yenu yene!”



Muka Price apona mumusowa uukalamba ati: "Umwinamwandi ukuyaumwa? Namashipi ukwisasenda. Amashipi yene e cuma twakwata muno calo cakwa Katungulu!"

Kwena nao wine alishiba ukuti uyo Sir Guy muntu walufyengo kabili umubi, ena afyenga abalanda nokubateeka kumunga wefwafwa.

Muka Price alatenyatenya fye icibili cakwe icaina, aposaika necikwepe cakwe kumutwe, ati: "Nga twalacita shani fwebantu?"

Lelo muka-kateeba-wa-nkuni, uwali uwashipa ukufuma na kukufyalwa kwakwe, akonkanyapo ati: "Mayo Betshi, ukulila fye tecisuma, kuli umuntu umo uufwile atwafwa, e wafwilisha nabalanda bambi bonse—ni Robin Hood."


Icisubilo catala camoneka pampumi yaina iyakwa Betshi apalekonkoloka ifilamba, kabinge apopene yamoneka bulandabulanda, pali ico aibukishe ati: "Nga nikwi twingamusanga? Takuli nelyo umo uwai-shiba incende aifisako."

"Umfwa," apali muka-kateeba-wa-nkuni; "ima, isa tuleya bonse!"



Ukucilinganyo mutengo, kwena patali, kwali icilibwe icamutuntula icikalamba, apalelongana amalabi nabamwankole. Mwisamba lyaciko mwali ulucengo umo itukami limo lyaleikala, ishina lyakwe Simon. Ukucenjela kwakwa uyu muntu kwaile ululumbi ukutali, abantu baleya uko ali kukundapwa nokufwayako icafwilisho cimbi. Lelo akwete nenkaama imbi. Ali fye ni eka uwaishibe imitanda yakwa Robin Hood, mumbimumbi mukati ka mutengo wa Sherwood. Utumilandu utwingi utwabi-pa uto Simon aletesha, nao e pakufisha kuli Robin Hood nebumba lyakwe, alepususha abalanda abengi kumacushi na kuku-kulikwa.

Panshita ine ii, Simon alelanda nabantu babili, abakwete impanga shilepelela mumi-sana yabo namata yakapapa munuma shabo. Umo ninshi aletuula panshi munjili, uo aishile napeeleka fye kwati lisako lyacuni pakubeya! Uyu muntu ni Little John, ishukushuku lyamufita fyakwa Robin Hood, uo bali nankwe e Robin Hood umwine!



Robin ati: "Inama ii Simon, ukalalyapo fye inshiku ishing. Te intu yanona nganshi bati!"

Simon lilya ati emye akanwa ukusantika utupondo-mpanga tulya tubili, aumfwa ukulila kwanyenjele, camulesha nokusosa!

Balya bantu babili ukwabula neshiwi, kwati baishiba kale umo umusowa wanyenjele walola, bafyetukila namukati kalucengo, Simon wena kulolekesha apo bafuma nga tapashele cishibilo cakubeshibilako ukuti paciba abantu bambi, aikala napanshi pakapuna kunse yalucengo lwakwe alalindila.

Kanshi cali nifi, banamayo cilya bafika apatantalile ukufuma kulucengo mwisamba lyamiti, baleka ukubutuka, muka-kateeba-wa-nkuni akoba muka Price pakuboko ati: "Lindila tupeelee icishibilo." Aya kucimuti icitali ukwatabilile imishimba nemipulampako. Bwangubwangu atabulula umushimba umo kucimuti, atinta namaka imiku itatu. Kumulu wamuti inyenjele yatendeka ukulila. Elyo panuma yakashita kanono balungama nakulucengo.



Simon alebalindila, bafika basosa nomu-
landu. Lilya bapwisha ukusosa mumutima-
nteeka, ati: "Muli neshuko, icafwilisho cili
mupepi sana ukucila ifyo mulesubila.
Nomba endesheni bweleleni kumwenu,
muka-kateeba-wa-nkuni, senda muka Price
akuyeni."

Lilya baya, aingila mulucengo, na lilya-
line Robin aletsha umulandu impumi
yakwe yafitulukila kumulandu wacipyu. E
pa kusosa ati: "Uyu Kamfumu Guy alingile
ukufundishiwa. Ale John bwangubwangu
twiposa nanshita."

Umukalamba Simon nao ati: "Ninkwata
ifyakufulunganya ubwakuti umuntu teti
akwishibe," aingila nakuncende iyamfiifi
mulucengo, aisako nemiina yansalu ibili.


John ati: "Tupite iyakusupula iyama-
lungu." Robin asumina.



Limbilimbi, pakamusebo kaleya kwilinga lyatiipwa ilya Bakamfumu ba Guy, kwaikele bakacema babili balelindila. Baikalile mumbali yamusebo balelya umukate na ciishi, ciweme cibi. Apopene likacema lyalipo ilipamfu—ilishukushuku lyati li-twale umukate pakanwa lyabamona, lyasosa mukapoopo aliti: “Te aba baleisa.”

Umubiye ati: “Ifwe natulelya fye, leka bapalame uko tuli.”

Kukutentemuka kwalupili kuleisa abashikale babili nabapiba nganshi, bateekele Price pakati balemutantanya, nomba alelebesha fye amoolu kumulandu wakunaka nomwensomo. Balya bakacema babili baiminina, balungama napakati kamusebo.



Robin, pantu te umbi cinecine ni Robin wine, ati: "Mwashibukeni, tamumweneko impanga ishilubile ili muleisa mumusebo mumbali yalupili?"

Umushikale umo amwankula ati: "Tatwaba nanshita yakusakamikwa ne-mpanga atemwa bakacema bene. Tuletwala uyu muntu kukumukampisha acenjele."

Nomba Little John nao mwishiwi lya-kuifulunganya, ati: "Eyo mwa, ngakanshi umulandu acitile uwabipisha mulandu nshi?"

Umushikale: "Alekele amashipi yakwe yalelya impimbili mumabala ya Kamfumu Guy wa ku Gisborne."

Robin Hood anjunusho mutwe ukufisa munkofila yakwe pakuti akaluseko kakwe kemoneka, elyo mwishiwi lyankulilishi aeba Price ati: "Ico cena cintu cabipa ukucita. Limo nalimwenepo abantu babili ukupa-mwa; naba bantu bashilika, elyo"—apopene bonse babili ena na Little John baimya inkonto shabo ishabukacema nefinkobo kumulu, ati nokuti—"shikulu nsuminisheni, tababalile abacilaba iyoo."



Ukukonka namwishiwi line lilya, aba bantu bafulilwe limo batampa nokuponya inkonto shabo panuma shabashilika, ukubalebela icawamisha nganshi ubwakuti teti bamone nanshita yakufisha iminwe kumpanga shabo mumisana.

Impumo shantanshi shali *ngeshi!* Shimbi nasho *ngefyo!* . . . Apopene inkonto shilepona panuma shabo—*lupuu . . . fopo . . . lapu!*

Ifyo abashikale bapundile, nokweshabaleesha ukucingilila imitwe yabo kuminwe! Efyo casungusha na Price, pakumona ilyo eminine palya ifintu fyayaluka! Icishele kusheto lushishi.

Apopene abashikale baumfwa impumo shacilamo, lubilo ntwala kumalinga ya kulupungu nabo abalebafyampa abati tuli nenu panuma. Ilyo Robin na John babafisha pabulalo bwakutinta, batontonkanyo kuti ukuleshe sembe kutangalala, bailofya namumutengo umwasapa bafisama, kuti nabaseka nembafu shalakalipa.



Little John ati: “Nga nga basumbishapo bamalonda bonse abakwisano, kuti caba shani?”

Robin atotomya fye ishiwi ati: “Teti bacicite—bali nokufisha umulandu pakubala kuli Kamfumu Guy.” Elyo atendeka ukukapisha umubiye ati: “John, mune bwelela kulucengo, uyeundeteleko ubuta bwandi ubukalamba nemifwi iisuma.” Lilya umubiye ati atambuluke aleya, ati: “Linda panono, webe kacele Simon umukoloci ukuti alembe ifi pakapepala . . .” Atepelesha namashiwi yamo mukutwi kwakwa Little John.

Mwilinga mwansofu-nkulu, Guy namona uko balya bashikale bapumawile babili baleisa, bekatilile mumpumo nokukoloba, atuma neshiwi lyakuti bese uko ali apopene.

Ifyo bamwebele fyalengele impumi yakwe iyabipa nakale ukuti icililemo ububi.



Nefyani namunsengo ati: "Finshi, mwaaa—mwalekela bakacema babili abafyefyefyefyefye bamucito musango uyu!" Apopene atendeka nokubakupaula umwine kulupanga mulya lwapapatila, mpaka bafonkola fye ulubilo ukufuma muṇanda. Elyo Guy aita kabilo wakwe, amupeela icebo cakuyai-kata abo bakacema nokwisabakulika ubufuleme muncende bakulikilamo bonse. Lelo kabilo ali muntu wamano.

Kuti lilya amona imfumu yabene yaputulako ishiwi panono, ilyo ileinyantawila nokusabaila, ati: "We mfumu yandi, abo bantu te bakacema iyoo, lupwa lwatupondompanga abateekwa kumulwani obe Robin Hood."



Guy mubukali ubwinebwine apunda fye ati: “Yaabaa, ilya ntlamisoka teti ingapamina ukupeepela fwaka mupepi nefibumba fyelinga lyandi!”

Lelo panshita ilya ine—Robin Hood ali fye mupepi nefibumba fyelinga lyalupungu lwakwe, ifyo Sir Guy ashaletetekela.

Kumbali yalupungu lwakwe kunse, kwali umuti uutali, na kumulu wauko eko Robin aninine, umulumendo uwaishibisha ukusotole mifwi mubuta mucalo conse, ninshi nafyantikamo nomufwi. Mwisamba namo umubiye Little John alaisha uko ali ati: “Ukutala ulungike, utumawindo twamulupungu lwakwa Guy ninsolokoto fye, noku-tantalila napatantalila!”

Robin wena aseka fye, ashintilisha nenuma kumuti, ateeka nomutima pakupima. Umufwi uyo, wayalashila fye pakacende akali ngecisansa caminwe ukufuma kunsolokoto.



Little John ati: "Mona nomba wapusa, waonaula nemilayi ili kumufwi."

Robin kusekakuseka ati: "Ine wine ukupusa! Ulya mufwi wacipimo fye. Nomba naishiba icipimo camuti pano ndi ifyo cilepungo mwela, kanshi nomba nalaongeshako." Akana ubuta bwakwe bonse apobwapela, nomufwi wacibili wasotoka, ukulungama fye bwinobwino mukati kanso-
lokoto. Nicikanga lilya line umufwi taula-
ingila, Robin nefyo ekile kumuti, bonse bandetamisoka balekukuba napanshi.


Guy acili alebikane fikansa nakabilo wakwe ukuti balya bakacema babili te bantu bakwa Robin Hood, napanshita ine iyo ali mukati kakusosa elyo umufwi walasa panshi mupepi namakasa yakwe. Akungu-
mana fye ngoufwile, palipitile akashita pakunukulo mufwi. Alekanka fye paku-
fungulula kakalata kapombelwe kwitete lyamufwi. Amashiwi yalipo ni aya: "Wike-
sha kuuma mubateeka amashipi, atemwa nine nkakuuma, cinecine neshina lyandi nine Robin Hood."



Apopene umushikale kutombokela kunso-
lokoto nga akalumba, tekwakumona nelyo
umo.

Panshita ilya ine Sir Guy wa ku Gisborne
alapa nomulapo uwamaka uwakuilandula
kuli Robin Hood, lelo ali nokulindila
inshiku ishingi pakuti cikacitike. Cali nifi
bushiku bumo, cinkupiti wabamonaki
aisatebelela panse yalupungu pakuti batu-
usheko balye nokulya. Kamfumu Guy
alelolesha fye kutemwakutemwa pakumona
uko balelongolole fipe pamfalashi. Pantu
pakakilwe ifimasanduku ifikalamba panuma
shamfalashi. Umukalamba wabamonaki
alolesha Guy ati: "Tuleya mukusokola
iminshoni imbi ukwakupepela, utunko-
lonkolo nefyuma fyesu fili mufimasanduku
filya."

Guy apapa ati: "Ala, umuntu kuti afi-
sama," nokuleka aleka, pantu apopene
atontonkanya ifyakucita!



Ubushiku bwakonkapo akasuba pakati kamutwe, Will Scarlett mukati kamutengo, nanina kumisambo yamuti, nacinga icimpembwe pamenso, awe amono mulongo wamfalashi nabantu balecilinganya amalungu. Balemoneka ngabamonaki, bafwele fyafita, lelo pampumi yakwa Will apabata-ma, pamoneke nkanshi shakutwishika lilya aleika ukuya kwibumba lyababiye.

Asosa ati: "Robin e, ifyakutapa filya fyatwishila, nganshilubile." Robin banina nankwe kabili kumuti, ilyo amone mikansu alakalipila Will ati: "Walishiba ukuti tatwibila bantu bakwa Lesa, Will, leka abene baye mumutende." Lelo Will amukanta pakuboko nokumweba ukuti alolekeshe ati: "Nikwi wamwene bamonaki baposele ntampulo pamo pakwenda nokwendela pamo nga abantu abafundwe fyankondo?" Robin auma umubiye pakubeya, apopene mwaisa amano.



Asosa nokusosa ati: "Aya maele bacitile, lelo naifwe tulebacenjelela sana."

Mwibumba lyakwa Robin mwali monaki umo uwaina kabili uwasansamuka ishina lyakwe ni Friar Tuck. Robin amutootoosha amashiwi yamo, amutangisha nakuntanshi ukuleisa umulongo wabamonaki.

Ii nshila yapitile mumushitu uwafina mululamba lwamumana, yakupula mufimpusa. Robin alishibe ifi. Alonganya ifita fyakwe afipeela nefyebo lubilolubilo. Panshita inono bonse basalangana.

Ngafilya, umulongo wabamonaki wala-palama kumushitu, ilyo bacili apatali panono ulya Friar Tuck uwaina asokoloka ukufuma mumiti.



Ashintilila kumutambu ukupashanya ngounakile sana. Aiminina pakati kanshila atambika nokuboko mwishiwi lyakulilishika ati: "Utwabupe, ku baba necitemwiko cacafwilisho." Umulongo onse nomba kwiminina.

Intungulushi yabamonaki yasosa mwishiwi lyabukalibukali ilishingaba ishiwi lya-muntu wakwa Lesa aiti: "Tufumine munshila we cimuntu we."

Nao kulilishika-kulilishika ati: "Shimwi-ngampelako fye nelyo lipeni limo, ninjishiba namukwate fingi ifingashalapo mufimabokoshi ifi."

Intungulushi yamukankila mumbali bukalibukali, yalembula nabonse ukuti bakonkanyepo ulwendo ukwingila mumushitu. Bonse bacili balefumfuma mumushitu ilyo baumfwa fye umufwi—fupu—walasa pacifuba cantungulushi, ii ine ntungulushi te umbi nikabilo wakwa Guy, nowaposele umufwi tewakumoneka.



Lelo ulya mufwi tawaingile ukumulasa, waponena fye panshi, kanshi ulya monaki wabufi, afwele ilaya lyaceela mukati kankansu.

Ishiwi mukati kamutengo lyalanda aliti: “Aa, te bwile bateyele? Efyo nali ntontonkenye!”

Apopene nentandala yalila, yaikatisha umusowa mumutengo.

Apopene kwati maele, ibumba lyabantu abafwele ifyakufwala ifyapalana namabubula, balafuntuka kumisambo yamiti uko bafiseeme. Bamonaki baba mucimfulunganya. Baesha ukuti bapimpule nkansu shabo pakuti bafumye mpanga, ala mukwai te mukanwa nkokwele, bashingwa bonse kutulumendo twalabatombokela nokubatansha mummyando. Elyo paisa nomuntu umutali nobuta muminwe. Bwangubwangu Robin aya kuli kabilo, alepule nkansu yabumonaki kusanga ilaya lyacela ilyankondo mukati.



Robin alamupumya ati: “Uli monaki bati? Ni lilali kabilo wakwa Guy engaba umutakatifu?”

Kanshi cali nifi, Guy nakabilo wakwe, balanda nokupekanya bwinobwino ifyo bafwile ukucita pakuteya Robin Hood; bonse balishibe ukuti ulubuli lwamusango ulya kuti lwasangwako, e calenga ulya kabilo alishibe nefyakusosa.

Ati: “We musuma Robin Hood, tatwa-kucite nelyo kamo akabi. Ico tufwalile imikansu yabamonaki ni pakuti tupishe ifyuma mumutengo, pantu twalishiba ukuti taulwisha bantu bakwa Lesa. Apo wasanga ubucenjeshi bwesu, buula fye ifyuma ifwe leka tuleya.”

Robin atala akutumana akashita, tashibe mwakulosha. Umuntu uwaba nge mfumu-ya-bene Guy e wingaleka mucuma cakwe ukwabulo kulwilapo. Aita Little John ukwisa mupepi ati: “Twalacita shani?” John napekanya nefyakwasuka ati: “Nga cinshi mune Robin, natubuule fye ifyuma, tukafibomfya mukwafilisha abalanda.”



Robin mukutontonkanishisha ati: "Nga fyuma cinecine, aleni isuleni imbokoshi yapakubala iyi." Bwangubwangu bacita, baisha, nokwisula baisula. Yaiswile fye utumifuko twampapa, ilyo baisula akamufuko kamo bamona fye ni ndalama shiswilemo shalila njee.

Robin kutemwakutemwa ati: "Cisuma kanshi cuma cinecine."

Lelo Robin acili aletwishika, ati: "Isheni imbokoshi shonse pamfalashi, bwesesheni nefiwelewele ifi kuli shikulwibo."

Imbokoshi shatantikwa umutande kululamba lwa mumana, elyo Little John aeba ababiye ukuti bafyantike imifwi mumata yabo.

E pakulekako nabalya bantu bamonaki babufi ati: "Umfweni imwe bonse, nga napenda ukufika pekumi, abantu bandi balepose mifwi, kanshi uulebutukisha e ulepusuka."



Robin talatendeka nakupenda, balya bantu bafonkolo lwakufonkola, ilyo bene batupondo-mpanga bawile fye kunseko, balebaposela nemifwi mumikonso nokubasowa, mpaka bashingilila baya.

Robin ati: "Baya capwa, natusende imbokoshi shafyuma kumutengo pakuti tuye-shiisula mumutima-nteeka!"

Lilya baya kululamba lwamumana pakuti bemye amabokoshi, umuntu wakwa Robin umo, amonapo icintu cimo icakutontonkanyapo. Imbokoshi aleloleshapo yali notupunda utwingi utwatulwa mumbali. Aita Robin. Robin alolesha bwinobwino, amona nefimasanduku fimbi fyonse fili fye umusango umo, kano fye ilyaine mbokoshi yaciba notumifuko twandalama mukati e ishakwete tupunda. Robin apepeko kutwi kumbokoshi imo, camusungusha pakumfwo mupeemo wamuntu mukati!




Asumbule nkupiko panono, amona taili yafungwa! Aima, aikatishe shiwi ati: "Aya mabokoshi tepakufina, lekeni imfalashi shitusendeleko ukututwalila uko tubelama."

Ilyo aima, aya alatepelesha amashiwi kumuntu wakwe umoumo, bonse balaitikinya fye. Bwangubwangu balalonga namabokoshi panuma shamfalashi, bali abasekaseka pamenso, bakunkisha nemfalashi, petenga lyamumana! Apopene amenshi yatendeka ukwingila mutupunda twambokoshi, ukwabula nokupose nshita ishiwi lyaumfwika mumbokoshi imo: "Mutuule, mutuule nalanwena!"

Robin kupumyakupumya, kwati nalimo atiina ati: "Yangu tata! Ishi mbokoshi shamaele. Kabili ndalama, icuma e calalanda. Teti tubuule icuma camusango uyu, putauleni intambo apopene fibundwe."

Apopene imbokoshi balafuntaula mumenshi imoimo. Inkupiko shalafwampukapo, ukulolesha te cuma cilimo, kanshi bashikale!



Ni mukanwa nkokwele, ifita fyakwa Robin fyayaitantika na kululamba lwamumana, balaposela abashikale mumenshi ifipompolo nefishinde. Abashikale kuti bati beshe ukufumina kululamba, babasunkilishamo kubantu bakwa Robin, nomba kutampa ukowa ukukonka umumana kwisamba, abantu bakwa Robin nabo abati tulinenu, babapoomapo nakasanga.

Nga caileba shani kumpuka yabashikale abatikina abailefika bulya bushiku kuilinga lya mfumu-ya-bene Guy wa ku Gisborne. Takuli engeshiba ifyo imfumu yabo, shikulwibo ailebacita, lelo inkuba yailepanta kuilinga pali ubu bushiku te yampempee. Abantu batila mwandini Guy umwine ewailelepauka kubukali.



